

Stroh-Phuppe saan die Kerwei an - seit 250 Jahr Schwowe in Billed

Wer am letschte August-Wucheend 2015 dorch Billed gang oder gfahr is, der hat Aue un Ohre ufgeriss, mit der Nas gschnuppert un is sofort drufkumm: do is was los! In der Mitt vum Dorf ware riesichi Stroh-Phuppe ufgstellt. In der Gass vum Kulturheim geger die katholisch Kerch ware Biertische gstann, „Mititei“ un Werschtle sin gegrillt wore, die Schattre han am meischte die Kiner angezoo un die Englischreiterei hat a nit gfehlt.

Die Billeder han ihre 250. Geburtstach gfeiert. Un des gleich drei Täch lang. Weit iwer 100 Billeder, die jetz in Deitschland lewe, sin zu dere Jubiläumsfeier angereist, um mit de dogebliwene Schwowe, jetzichi Ortsbewohner un anri Gäscht 250 Jahr seit der Ansiedlung der Deitsche zu feire. Beim Sitz vum Deitsche Forum is zu dem Anlass e dokumentarisch Ausstellung un e Heimatstube ingeweihet wore (derdriwert kennt der meh in der näkshti „Pipatsch“ lese).

De Hehepunkt vum Fescht war de Kerweisunntach. 25 Trachtephaare sin schun zeitich am Morjet dorch Billed maschirt un han zur Kerwei ingelad. De Kerweimarsch, es Kerweistickl un ach Tanzmusich hat die Blechmusisch Billed-Alexanderhausen (die ach aus Deitschland kumm sin) geblost. Die Kerweiphaare ware Jugendlich, die jetz in Billed lewe, jingri un älteri Trachtenphaare aus Karlsruhe un die Mini-Billeder (Schulkiner). Sie were vum Tanzlehrer Hansi Müller inschtruiert. Es Gemeindehaus hat sich nit lumpel gelost un die Kinertrachte bezahlt. Un es is alles wie am Schnierche abgeloff. Derfor hat sich insbesondere die Familie Roswitha un Adam Csonti, Vorsitzender vum Billeder Deitsche Forum, ingesetzt. Doch ach Werner Gilde, Vorsitzender der Heimatortsgemeinschaft Billed, un Peter Krier, Ehrenvorsitzender sowie anri Landsleit han mit Rat un Tat mitgholf.

De Billeder ihre Kerweinarr - Dass beim Ufmarsch un Kulturprogramm ufm Sportplatz alles bikobello un ohne Fehler ablaafe soll, derfor hat de Kerweinarr gsorcht. So werd in Billed (un in phaar anri Banater Ortschaften) de Anfihrer/Owermacher genennt. In bliedlweisser umgebunnener Scherz, mit em schwarze Hut (der nor eene Strauss hat) ufm Kopp hat de Kerweinarr derfor zu sorche, dass die Reih so grad wie e Schnur beim Ufmarsch is. Dass es Eck- un Kerweistickl getanzt werd, dass die Buwe juxe un „Kerwei“ rufe, dass was do is, for die Gorgl nass mache un noch vill anri Kleenichkeite, for die annerorts de Kerweivater zuständich is.